

RNI. No. MIZ.MUL/2009/29499  
Postal Regd. No. MZR 82/2010 - 12

To

# LAITAI

Vol. II. No. 5. May 2010



*Numei pilte in  
innsung nuntakna  
khangsak a, numei haite  
in innsung susia fi.*

(Paunak 21 :9)

**From :**

**LAITAI**

**ZBC Office,**

**Champhai - 796 321**

**Mizoram, India.**

**Editor : Rev. Suan Khan Thang**

# LAITAI

(An organ of the Zomi Baptist Church)

**Vol. II, No. 5. May 2010**

**Editor :**

Rev. Suan Khan Thang  
B.A., B.D., M.T.S  
☎ 09615558559

**Editorial Board :**

Upa Zam Za Lang  
Upa Zam Khan Kap  
Upa J. Thawmte  
Sia Nang SianMung  
Pa Zam Lian Thang

**Business Manager:**

Sia N. Chin Thang  
☎ 09615948861  
Sia Tin Sawm Lian  
☎ 08014225066

**Circulation :**

Pa Thang Khen Muang

**Address :**

Laitai,  
ZBC Office  
Champhai - 796 321  
Mizoram, INDIA

Office : 03831-234700

Email : zomibaptist@yahoo.com

Website : zomibaptist.com

**Zon-olna Laimai**

Editorial	01
Job nuntakna pan ..	02
<i>Tg. Tin Sawm Lian</i>	
Pawlpi	05
<i>Pa Kham Do Pau</i>	
Kisin Kum	06
<i>Rev. Gin Lam Thang</i>	
Nu leh Pa zahtak ding	09
<i>Nu Cing Ngaih Zen</i>	
ZBC Mission Khawmpi	10
<i>Mission Secretary, ZBC</i>	
Hiangmun Khawmpi simna	14
<i>Dr. Hau Za Cin</i>	
Zolai Gelhzia	20
<i>Rev. Khoi Lam Thang</i>	
Tulai Thupiangte	23
Pulakna (Declaration)	24

**Laitai kum khat tatman :**

India & Kawlgam ..... Rs. 50/-  
Gamdangte ..... U.S. \$ 5/-

**Edited & published by** Rev. Suan Khan Thang, on behalf of  
Zomi Baptist Church, and printed at C.K. Printing Press,  
Champhai, Mizoram - 796 321, and published at Bethel,  
Champhai, Mizoram - 796 321, INDIA  
Copies - 900



(L-R) : ZBC Exe.Secy., APBW -Aid Proj. Officer, Rev. Mette, Lairam Baptist Asso. Gen. Secy., APBW-Aid Director, R&D Secy. (BCM)



(L-R) : ZBC President, BCM General Secretary, ZBC Executive Secretary



(L-R) : Secretary, Aizawl Auxiliary, BSI, ZBC President, ZBC Executive Secretary

A sunga thuluite(articles) thu hong luikhiate sandan hi a, Editor saandan hi kim lo hi.

## Nu Cingtaak

*Lai Siangtho sungah 'nu' hihna a cin mahmah a kigente lakah khat in Ruth ahi hi.*

*Amah in minam dang tenpihin, biakna dang a bia tawh kiteng a, ama nung (naw) lamte a mudah hi het lo napiin, a manawh (a pasal) lamte lungkimsak mahmah hi. A pasal in a sihsan khit ciangin ut hi leh, a inn ah ciah thei hi napiin, a teeknu hehpihhuaisain, a teeknu a sih dongin kep leh don a sawm hi. Numei gina lo pawlkhat hi leh, a pasal a sih ciangin, suakta kisain a teeknu don nuam loin, ciahsan vingveng kha ding hi.*

*Tua zahtain huh kisam piteek khat Ruth in a kepna in Pasion lungkimsak hi ding hi ven, amah Ruth in a zon masak zong ahi lo, ateenna khua sunga mi neizo mawh lo Boaz in tenpih hi. **Mi a hehpihte in hehpihna ngah ding uh hi** (Mat. 5:7) a cih Ruth tungah a tung hi.*

*Tulaiin nungak pawlkhat in piteek leh puteek kep ding a ut loh manun, inn luah dingte a pasal dingin deih masa lo uh hi. Piteek puteek kep kulte kepna-ah Pasion' thupha a om lam thei hi le uh teeknu teekpa kem dingin kituh zawzen mah ding uh hi ven!!*

*Papi khat, a tapate in zi nei tek uh a, amote amah a kem nuam om lo hi. Tua papi pen a tanu neu khat in kemin don a, Pasion in tua a pa a kem numei pen pasal guan a, a kitenkhit uh ciangin a pasal in kumpi nasepna ngahin, a tate uh zong thupha piain laipilna nei tek uh a, a sawt loin ulian (Officer) suak ding uh hi.*

*Nu cingtaakte a inn sung uhah a pasal lamte leh ama' aate maitai tuak uh a, Nu Cingtaak lote a innkuan sungah a pasal lamte zual lo uh hi. Lot' zi in a pumpi in a pasal kiangah a om tei hangin, a lungsim Sodom khua-a a innkuanpihte kiangah omden ahih manin a nuntakna in a thuk lawh hi.*

*Mo a nunglamte bek a pibawl dendente, bang tan hiam gualzo a bat hangin, a pasalte' innkuan in a kham luat uh leh, "Sanggam Committee" nei thei uh a, thunamtui khol lo **'resolution'** pass thei uh hi.*

# JOB NUNTAKNA PAN..

Tg. Tin Sawm Lian, Champhai

Lai Siangtho a i muh mah bangun Job pen Pasion a zahtak mahmah mi hi a, gamtat hoih lo peuhmah tawh a kipel mi ahi hi. Hih bang zahta a mihoih himah leh Pasion in ama tungah a muanhuaina a kitel nadingin ze-etna, Satan bawlsiatna thuak phal hi. Job haksatna thuakte pen leitung mite' ngaihsutna panin thuakzawh ding zong hi kei mahleh, Job in hih a thuakna/gimnate hangin Pasion tungah a muanhuaina kidawksak a, ze-etna thuak zo hi.

J. Malsawma, Mizo Writer khatin, "*Haksatna pen mihing nuntakna tel nading in ahoih pen ahi hi,*" na ci hi. Amahmah in, "*Haksatna zawhdan pen thuak ahi hi,*" na ci sawnsawn hi. Tua mah bangun Job in haksatna, ze-etna a thuak pen ama nuntakna/muanhuaina theih nading a ahoih pen hi a, tua haksatna pen thuakna tawh zo hi. Hih Job nuntakna pan sin ding tampi tak om a, tua laka pawlkhat kong gelhkhia hi :

1. **A neih leh lam, atate Pasion piak ahihna Job in phawk** : Job pen Nisuahna gam sungah a haupen khat ahi hi. Amah in tapa sagih leh tanu thum nei a, tuu tul sagih, kalaoh tul thum, bawngtal kap zanga, leh nasem tampi nei hi. Tuabang a neih leh lam, a tate thakhatthua hong sih khith uh ciangin Job in, "*Ka nu sung panin guaktangin ka suak a, guaktang mahin ka ciah kik ding hi. Topa in hong pia a, Topa mahin hong la kik hi. Topa' min kiphat ta hen,(1:21)*" ci thei lai hi. Hih a neih leh lam, a it mahmah atate Job khialhna hanga a si hi lo a, ahi zongin Job in Topa mawhsak lo hi. Hih i leitung nuntakna-ah i innkuan

sung, i neih leh lam, i sanggam, i tanau, meltheih te'n hong paisan ciangin Job nuntakna panin cihtakna sinin, kip tak leh muanhuai taka Pasion mawhsak lo a i zuih theih nadinga lam hong lak, etteh ding (model) hoih mahmah ahi hi.

2. **Job in mihing nuntakna tel** : Job in a neih a lam leh a it mahmah a tate'n a sihsan khith ciangin Pasion taisan lo ahih manin Satan tung pan ze-etna lian mahmah thuak kik hi. A khetul pan a luzang dongin a kihhuai meima thuak hi. Job in, "*Zan thapai-in ka guh sung na a, hong pet tawntung natna dai ngei peuhmah lo hi, (30:17)*" na ci hi. Tua ahih ciangin hih a thuak

meima natna pen na mahmah ding cih kithei hi. Tua banah hih bang pumpi natna a neih banah, zana a ihmud ciangin zong mang hoih lo pipi man a, “*Lum leng nuam ding a, ihmu leng phatuam ding hi’ ci leng lah, a lauhuai mang nong mansak a, a lauhuai maangmuhna tawh nong lausak hi, (7:13-14)*” na ci hi. Hih bang zah donga haksatna thuak pen haksa mahmah ding hi. Tua bang a thuak laitakin a tel mahmah om hi; tua pen mihing nuntakna tom mahmah a, lungkhamna tawh kidim, paak bang a a vul kik pah leh, ni liim banga a pai hanhan ahihna ahi hi. Kaphleia in, “*Haksatna i tuak ciangin ‘ka ui ka ak’ hong ci nuam zong om kei*” acih mah bangin, Job in zong haksatna a thuak ciangin a sanggamten taisan a, amah a theisate kiangah khualmi suak a, a beh leh a lawmte beimang a, a inn a tungzel a zin te’n zong manggilh uh hi. A zi nangawn in a gimnam thuak zo lo a, a sanggamte in zong naih nuam lo in, naupangte nangawnin simmawh uh a, mi in a muh uh ciangin nuihsan uh hi. A it alawmte in zong mudahin langbawl uh hi. Tua bang teng leitungah om ahih lam Job in tel mahmah hi. Haksatna a thuak

ciangin, amah a panpih ding mi a om loh lam leh, amah a panpih ding Pasion a om lam tel a, Pasion bek muan tak ahiz zia phawk kikkik hi.

**3. Job in ama hoihna pulak :** Hih bang haksatna Job in a thuak ciangin bang hanga hih bang liang thuak a, sep khialh, bawl khialh bangmah a neih loh thu Pasion kiang ah pulak ngam hi. Pasion kiangah a dahmate pulak a, leitungah hih zahta a a thuaknate na sa lua ahih manin a sisain a piankhiat loh na sa mahmah hi. Pasion kiangah, “*Ka mawhna ka khialhna bangzah pha ahiam? ka mawhna ka khialhna teng hong thei sak in, (13:23)*” ciin dong hi. Tulai i Khristian nuntakna ah Pasion in mimawhte ngai cih manin mi pawlkhat in mawhna bawl sawm hi. Pasion kiangah i hoihnate pulak ding hi leng, bang zah pulak ding i nei ding hiam? Hoih lohna teng gengen a, hoih a sawm tuan lo i hih ding lauhuai hi.

Job lawmte Elifaz, Bildad leh Zofar in a thuakna pen tanglai amau’ biakna lungsim puakzia tawh kizuiin na genpih uh a, Job mawhsak in, Pasion a seelna leh mawh a kisak lohnate tawng uh hi. Job in hih a lawmte’ mawhsakna na sa mahmah a, “*Leitung aw, aman loin kei*

*hong kibawlna selcip kei in! Thuman deihin ka kikona ka aw ging daicip sak kei in,(16:18)*” na ci hi. Thuman a deih mahmah ahihna zong hong kilang hi. Job in ama hoihnate pulakin thei hi. Mite mawhsakna leh Pasian tungah a phun hangin, *“Kei adingin ading ding a hong panpih ding mi khat vantungah om hi,(16:19)*” na ci veve hi. Tua hi a, Job in ama nuntakna-ah hoih lohna gen ding a om lo zah dongin nungta a, Pasian deihna leh Pasian muang takin nungta hi.

4. **Job a upna-ah kip hi** : Job in aneih a lam, a it mahmah a tate a taan khit ciangin, ama pumpi mahmah-ah haksatna lianpi a thuak ciangin ama zi mahmah in a Pasian samsia a, si mai dingin na hanthawn hi. Tua bang ahih laiin Job in a zi kiangah numei haite bang a pau lo ding leh, **Pasian tung pan hoihna tampi sang a, siatna zong a san ding** ahih thu hilh thei lailai hi. A lawm thum te’n Job mawhsak a, ahoih lohna gen sawm uh a, haksatna a thuakte pen ama mawhna hang hi, na ci uh hi. Tua bangin amah a mawhsaknate uh a man lohna Job in a tel banah, a lawmte tawh a kiselna a ngai a kiang vua om Elihu in zong na tel mahmah hi. Tua bang a a lawm thum te’n Job

a mawhsakna hangun amaute tungah Pasian heh a, amaute mawhsak hi. **Job pen a lawmte cihna lamlamah suk-hoi to-hoi lo a, a upna kip hi.** Tulai i Khristian nuntakna-ah haksatna/natna i thuak ciang, ahih kei leh buaina bang hiam i thuak ciang, tua bang na cih loh man hi, tua ci bangin ci le cin dam ding hi teh.... cih bangte panin Job nuntakna ah etteh ding tampi tak om hi.

**Thukhupna :**

Job nuntakna, haksatna a thuak laitaka a lunggim ding dan pen ngaihsut pak sangin nasia zaw ding hi. Hih haksatna a thuak laia Job nuntakna pen **Sehnel gam keuna mun, tui om lohna mun a dangtak/tuiduh a nakpi a kiko hangin tui a om thei lo** tawh kibang ding hi. Haksatna a thuak ciangin a kikona Topa in dawng pah lo a, thuakna tawh zo hi. William Shakespere in *“Haksatna/kamsiatna Uiphuk banga melsia in zong suangmanpha na kem thei veve hi,”* a cih a maanna hong kilang a, ze-etna pen ama ading a suangmanpha ahi hi. Tua bang teng a thuak khith ciangin, *“Nidangin mi genin nang kong thei a, tuin a takin kong mu ta hi, (42:5)”* na ci thei lailai hi. A upna kip takin len ahih manin Satan in susia zo lo a, Pasian in ama

a a neihzah nih, neih leh lam guan hi. Tuu tul sawm leh tul li, kalaoh tul guk, bawngtal kap tul khat, leh a la a pi tul khat leh, tapa sagih leh tanu thum mah nei kik a, a tanute zaha melhoih leitungah

numei dang khat zong om lo hi. Job bangin haksatna, ze-etna i thuak ciangin a kip dingin Topa'n a simkha mimal kim thupha hong pia ta hen! AMEN ■

---

---

## PAWLPI

- Pa Kham Do Pau, Aizawl

*“Tanglai Greek mite leh Hebrute ahi zong, Mikangte kam pan a kitei sawn ahi lo, Zomite kammal mahmah tawh a kibawl, a kiphuak Zosuan dangte in a neih vet loh uh ahi Zomite kam bek tawh a om ‘Pawlpi’ ahi hi”*

Pawlpi kici pen Greek kam ‘ecclesia’ pan kiteisawn hi a, a deihna in, ‘sapkhiatna’ (kohhran) ahih kei leh ‘mipi kikhawm’ cihna hi kha ding hi. Pawlpi i cih pen Khristiante kampau bangin kilang mahleh Khristiante om main zong tangthu na nei zo hi. Tanglai Greek khangthu-ah Pawlpi kici pen suahtakna gama khua leh tuite vaihawm dinga hun man taka a kikhop zelna uh genna hi a, mipi tawh kisai kamkum dingin tangkoin mipite samkhawm zel hi. Thuciam Lui hun lain pawlpi pen Israel pawlte leh a memberte zong Pasion sapkhiat bangin a kingaihsun ahi hi. Tua mah bangin Sawltakte laibu sungah Stefen in Moses pen gamkeu gama mipite kianga ompa ciin ana gen hi. Kum zalom khatna (Ist Century) lain

Greek mite amau sunga vai kihawmna genna hi a, Judate adingin bel Pasion’ mite Pasion thu a kipawlkhopna genna ahi hi.

Pawlpi ci a Khristian bangkua sunga a kizat masakna penin Jesu in Peter kiangah, ‘Hih suangpi tungah ka pawlpi ka lam ding a, sihna nangawnin a zozo ngei kei ding hi’ (Mat. 16:18). Tua ahih manin Jesu pen Pawlpi phutpa ahi hi. Tapidawte sungah Pawlpi phuta, Pawlpi pen amah tungah a kinga ahi hi. Keima phuhsa khuam thupi teng ahi Jesu Khris cih sim loh kuamah dangin khuam thupi dang phut thei nawn lo ding hi (1 Korin 3:11).

Zomite in daw leh kau bia a, i pu i pate a om lain Tapidaw i suah main hih bang kammal na om lo hi. Tapidaw i suah zawh

ciang Pawlpi cih kammal kizang pan hi dingin ka ummawh hi. Tua ahiah manin Greek te *ecclesia* acih sangin zong thupi zaw a, zong siangtho zaw bilbel dingin ka lamen hi. Leitung vai leh lawki vai tawh zong a kisawh buai vetlo min ahi ‘Pawlpi’ cih pen Zomite Pasion in hong lamto ahiah manin pawl dang tawh kibang vet lo a, a tuam vilvel in hong phuansak hi ka ci hi. Pawlpi pen **‘leitung minam cih mawhna pan gupkhiatte, Jesu Khris nungzui dinga thu khensat a, Pasion thu in a hong sinsak singlamteh tunga Khris sihna in Amah Gumpa leh Kumpi a**

**sang mite mawhna thaman a pia hi’** cih a umte pawl ahi hi. Zokam tawh Pasion biak kipawlna i neih zenin minam hong thupisak a, Zosuante lakah hih bang a ‘Pawlpi’ cih azang kuamah dang om lo hi. Tua ahiah manin i Zolai i Zopau Topa hong piak ahi cih theiin, zumpih nawn mahmah kei ni. **I zumpih leh Zokam zumpih hi loin, a piangsakpa i pa Pasion a zumpih i hi ding hi.**

*\* Unau Luseiten Kohhran ci uh a, tua pen tangtaka lehkhiaht ziauh in Paite kampau ten Saptuam na ci leuleu uh hi. Hihte khempeuh pen ecclesia pan kiteisawn vive ahi.*



## KISIN KUM

- Rev. Gin Lam Thang, Shillong

**Thu kong honna :** ZBC Pawlpi in kumsim in “Kum Puan” kinei a, tua kum puan tawh kizui in ma i lak theih ding kizam pha peuh mah hi. Tu kum 2010 in KISIN KUM cih gambup in thulu in kinei a, i kisin nop nak leh sin ding tampi om hi. I kisin nop loh manin i hih ding bang hi zo lo, i phak ding bang pha zo lo hi hang. A diakin biakna tawh kisai in Zomi pasalte a kisin nuam lo pente i hi tam cih theih phial hi. ZBC gambup sung Pawlpite ah pasalte sangin numeite in ma bun zaw uh a, hanciam zaw uh hi. Innkuan sung biakna ah zong numeite mah kiva zaw mawk uh hi. Tua hang ahi tam Zomite in minam dangte i phak zawh loh niloh. Biakna tawh kisai hi in, a dangte ah hi taleh, Innkuan sunga Pa penin a zi leh tate a makaih ding ahi hi. Makaih a siam kei leh a kisin ding a tavuan hi. Biakna makaihna ah zong Upate in Pawlpi mite a makaih ding ahi hi. *Kisin Kum* lungsim a vom kawmin hih a nuaiate kikum dih ni e.

**Makaite khanlawh Kum :**

Pawlpi hi in kipawl khopna khat peuh ahi zongin, makai khat i hih leh hih 2010 kum mawk beisak loin kipuaphat kum leh kisin kum dingin zang ni. Midangte i makaihna ah a ngei banga i makaih den leh a nungki hi hang cih kiphawk ni. Lawpna leh kipiakna kihel lo, i mawhpukna ahih mana sem lel i hih leh, i makaih mipite in i tungah lametna nei lo ding a, hong ngeinaseh lel ding hi. Makai hoihte in amau a laih ding midang sekkhia hi. Ei bekin i makaih den leh makai hoih hong kici ngei lo ding a, hihna deih hong kici zaw ding hi. Tua ahih manin midangte i makaihna ah khangloin, makai dingin midang sekkhiat KISIN ni.

**Leiba awlmawh Kum :**

Leibat hanga innkuan min dai, thunget hahkat mahmah napi leiba awlmawh het lo om hi. Sum leitawi baihsak mahmah ahi zong lohki ding awlmawh loh pen Pasion nasemte cih dingin kilawm lo a, mi muanhuailote cih ding bek hi zaw hi. Sumbawl na tawh kisai in leiba neih pen leitung ngeina khat ahih laitakin, sumbawl lopi a leiba neih pong pen khantawn min daina hi cih thei ni. Tua ahih manin hih kum thak pen leiba awlmawh kum a zangin i sum

batte loh KISIN ni.

**Tavuan zawh Kum :**

Pawlpi leh kipawl na khatpeuh ah mawhpukna hong kipiak loh ciang a phun nuam a ciak nuam ki-om thei hi. Tua bang mite in mawhpukna a neih uh ciang a tavuan uh a zo lote hi citciat. Hihna leh za bek a deih, a tavuan a thei lo kitam ta hi. “A mah pen Pawlpi ah tua hi” cih ding ut mana hihna deih, ahih hang tua hihna in a tonpih tavuan a sem nuamlo kitam hi. Tua ahih manin tavuan zawh Kum hi dingin KISIN ni.

**Nekzonna awlmawh Kum :**

Zomite in nekzonna hoih leh kician i neih loh manin mimal leh innkuan kisikh zo loin, Pawlpi leh minam bup dongin haksatna kituak hi. Nekzonna kician neih ding awlmawh-in, lawhcin sawmin lungsim takpi tawh hanciam leng lampi om ding hi. I gil a kial manin i hangsan ding zahin kihangsan thei lo a, i pil ding zahin kipil zo lo hi. I sep theih bang om hiam cih kikum in lawhcin sawmin sem ni. Thu ginalo peuh gen sangin khantohna ding thu uang gen in, khantoh sawm in KISIN ni.

**Muanhuai Kum :**

Muanhuai taka nuntak pen a haksat mahmah hangin a gah limci hi. I

sep i bawl khat peuh ah muanhuaina tawh i nuntak leh tua ah lawhcinna om hi. Mi muanhuailote kuamah in muang lo ahih manin, muanhuaina pen sumngum khat suak thei hi. Lai Siangtho sungah tawmcik tunga muanhuaite tampi tak kipia ding cih thu om hi. Tua ahih manin midangte in hong muan ngam ding zahin muanhuai KISIN ni.

**Ei tawh kituaka nuntak Kum :** Veng leh pamte in nei tah cih mana ei tawh kituak lo i neih a om hiam? Bike, Car leh Cellphone nei dingin i nek zonna tawh a kituak hiam? Sum muhna leh nek zonna kician nei ngap lopi in i kizemna khawng a sang lua hia ? I sum muhna tawh kituak a nuntak KISIN ni.

**Ki-ukna awlmawh Kum :** Mihingte a hona omkhawm ganhing nam khat i hih manin, i tenkhop theihna dingin kimakaihna zia, thukhun leh dan kibawl hi. Kumpi leh Pawlpi in zong thukham nei hi. Hihte a nial leh a lang pan i hi kha hiam? United States pen suahtakna gam kici a, ahi zong thukham tamna pen ahi hi. Zomite in ki-ukna leh kimakaihna i awlmawh loh manin Pawlpi tuamtuam leh Sia nengneng kihau mahmah hi. Tua

ahih manin kimakaihna leh ki-ukna awlmawh KISIN ni.

**Hun maan zat Kum :** Minam pil leh khangtote in hun a man takin zang uh a, a pil nailote in ahih leh hun man zat ding ki-awlmawh khollo hi. Committee ahi a, kimuhkhopna khat peuh ahi zongin, hun a man taka zat ding i awlmawh loh manin, hun tampi mawk beisak hi hang. “Mi in zong ci hi lo maw’ ci loin, hun man zat sawmin KISIN ni.

**Thukhupna :** Mi pawlkhate in pawlpi leh kipawlna khatpeuh ah hihna a ngah nawn loh uh ciang hehna ding leh nuakna ding zong thei zel uh hi. Hici bangmite pen amau bek pil a kisate ahih kei leh, kipawl khopzia a thei lo, a piangthak lo cihna hi. Ama makaih sungin midangte in muanhuai takin zui uh a, midangte makaihna nuaiah amah zong a kuun siam ding kizam hi. Zomite in hih gu vei mawk i hih ciang pawlpi kitam kham, kikat nen i hih manin, minamdingte bangin khangto thei lo hi hang. Thutuam sat den na muh leh, “Piangthak lo hi” cih thei in la, a gamla thei penah omsan ding KISIN in. *(Hih thu Lengzem January 2010 sung pan kilakhia hi a, a thu pawl khat a kisapna munte ah kilaih in kibehlap ahi hi.- GLThang)*

# NU LEH PA ZAHTAK DING

- Cing Ngaih Zen, Zokhawthar

*Tate aw, na pate uh thu na man dinguh Khristian ngeina hi a, ahi ding mah ahi hi. Thupiakna alian khatin na nu leh na pa zahtak in, cihna hi a, khapna thu tawh kizom pahin, zahtak lecin nang adingin thu hong hoihin, leitungah na khan sau ding hi na ci pah hi. (Efe. 6:1-3)*

I Lai Siangtho genna i muh bangin nu leh pa zahtak pen khansauna hi a, Khristian lo ten zong ei Khristiante sangin nu leh pa zahtak siamzaw uh hi. Khansauna thupha ngah na hiin, Pasion in i nu leh pate tungah atate ading thupha na koihsak hi. Tua ahih manin, nu leh pa hai in mawl ta leh, leitung pilna nei kei ta leh, nang adingin na muh theih Pasion hiin, na leitung pasian ahih manin, na it na zahtak ding ahi hi.

Nu leh pa i zahtak mah bangin i Siate, i makaite, Pawlpi makai masate i zahtak ding Topa deihna ahi hi. Mi zahtak a siamte amau zong mitein zahtak hi. Mi na simmawh leh, nang zong mi'n hong simmawh ding hi.

Pata kiho khat apa lailam bangmah tan a tung lo khatin a tapa Sivuanpi (Doctor) suaksak a, tua a tapa in a pa pen 'bangmah thei lo' ciin simmawh bawl a, a pa'n, "Kei mimawh bangmah thei

loin hih ciang hong tun ka hih ciangin, nang Siavuanpi in na tate bangtan na tun hiam?", ciin dawng hi. Tua ahih manin ute, naute kingaihsun ciat ni.

Tua hi a, lai siamin bang tan na tung zongin lai thei lo na nu na pa mah thupi zaw hi. Pasion thu a i muh mipilte maizumsak dingin mihaite ka teel hi, na ci hi. Amah a zahtak a, a thu um a, ama na a semte Topa'n na pahtawi in, thupha na pia hi. Tuате mah zangin mipil misiam Topa'n hong pia hi zaw hi.

Topa'n ahau, a zawng, a pil, a hai, ci loin, amah a itte ana asem nuamte ama ading a kiphah, a kipiате zang nuam hi.

Atunga i gensa bangin nu leh pa zahtak siamte leh galkapte in a bupa zahtak siam, sang naupangten a siate zahtak siamte, Upa, makaite a zahtak siam, Siate a zahtak ten a bawlpa Pasion a

zahtak hi a, mi a simmawh ten a      peuh mi a simmawh hi loin, a  
bawlpá Pasián a simmawh ahi hi.      zahtak siam dingin i kideih hi.  
Tua ahih manin, a kuamah-      Topa'n thupha hong piásak ta hen.

---

---

## **ZBC MISSION KHAWMPI 4-VEINA NUAM TAK KIZO**

*-Mission Secretary, ZBC*

Ni 12-14 March, 2010 sungin Hiangmun ZBC biakinn ah a 4-veina Mission khawmpi kizang hi. Thulu “Keima kha tha bek tawh na ma na tun ding hi”(Zekh. 4:6). Champai Area panin motor, 407 nih leh Pick-up khat, Hnahlan Area panin Jeep khat leh Sumo nih tawh pai in, Aizawl Area in Bus khat hong zang uh hi. ZBC Pawlpi inn tengah zin hong tunsak hangin hun manin biakpiakna kipan thei zel hi. Hiangmun khua pawlpi mite kihongin, khawmpi nuam kisa ciat hi. Hiangmun khua sunga Pawlpi dangte in a biakinn uh khakin hong uapna uh thupi kisa a, khua kilungtuak ahihna uh kilang mahmah hi. Hici bang khua kilungtuak ah khawmpi a kizat manin kihampha mahmah hi. Khawmpi nuam hong suah theihna hangte in :

- 1. Khawmpi honna :** Rev. Dai Do Thang Pastor Aizawl & Sialkal Area in khawmpi pen Pasián thupina dingin Pa, Tapa leh Kha Siangtho min tawh honna a neih banah thungetna nei hi.      Halelluijah! Amen ci in kidawngin mipite hong kikosak ziahziah den a, Lai Siangtho simin lungsim khempeuh Pasián biakna lam nga dingin thapiakna a tuamtuum a bawlna uh in, biakpiakna sungah thalawpna hong lim guat mahmah hi. Hun uk te :- Upa Cin Khan Kam, Upa Dam Khan Go, Upa Z.K.Dong, Upa Cin Ngaih Lian, Upa Khup Khan Pau Ex-Hav. leh Tg. Josef te hi uh hi.
- 2. Devotion :** Evan Lian Go leh Evan Zel Thang makaihna tawh zingsang nih devotion hun kizang hi. Hih hunah hanthotna tom kingai khiain lasakna leh thungetna tawh hun kizang hi.
- 3. Hun uk :** Hun ukte in
- 4. Hun pan te :** Lai Siangtho sim

uh a, lungsim leh cihtakna tawh Pasion maiah hun leh vaite ap a, hong uap dingin Pasion Kha Siangtho ompihna limtakpi mahin thum uh hi. Hun pan te :- Sia Hau Za Khup Gamsung Missionary, Nu Zam Ning, Nu Lian Sian Niang, Nu Cing Ngaih Ning, Upa Do Cin Thang leh Upa Nang Ngaih Liante ahi uh hi.

## **5. La tawh Pasion min phatna**

**1) *Phatna leh biakna*** : La makai BYF te :- Vaikhawtlang, Champhai, Aizawl, Sesih leh Leisenzote hi uh hi. Amaute makaihna tawh nai khat sung tang bang lasak khopna kinei den hi. La makaite peuhpeuh kipiazo mahmah uh a, Biakinn nai gin main la makaih uh hi. Siansan Labu leh Tedim Labu a khanlawhna late kisa a, kilawpin kilam damdam hi. Labu sunga om lo Zion lapite nangawn kisain, lamna dianna tawh Topa min kiphat ziahziah hi.

### **2) *Lapawl*** :

a) *Zo La Aw Kaih tawh phatna* : Sialkal Area te in Zo La Aw kaih tawh Pasion min phatna hong neih uh ciang lungsimte lawngin i ngeinate zahpih lo a, Pasion hong phat uh ciangin kuamapeuh hong thalawpsak mahmah hi.

b) *Solfa aw kim a phatna* :

Hi pen lapawl ngeina i cihte hi. Biakpiak kikhop simin khua tuamtuam panin solfa aw kim tawh siam takin Pasion phatna om den hi. Lasak siam thei mahmah uh a, a lasakte uh in mi lungsim lawng mahmah hi. Lapawl a nei khuate :- Hiangmun, Mimbung EBC, Murlen, Sesih, Aizawl BYF, Teikhang BWS, Ngur Vengsang, Champhai BYF, Hiangmun EBC, Leisenzo, Hnahlan, Vaikhawtlang, Senior department Hiangmun te hi uh hi.

**3) *Solo*** : Mimal tuamtuam tung panin phatna la kingaikhia den hi. Mimala Pasion phatna neite pen khangnote hi uh hi. Hici zaha khangnote in phatna lasak a lunggulhna uh pahtakhuai mahmah hi. Mimal a lasakna a nei te :- Cinpu Teikhang, Gin Lam Thang Mimbung, Tg. Pau Ngaih Thang Vengthar, JM Muan Sesih, Tg. Lianpu Hiangmun, Pa Lianpu Leisenzo, Thangboi Teikhang, Zodin Hiangmun, Nu Cing Saan Ni Hnahlan, Tg. Sawmte Champhai, Lia Man Deih Aizawl, Tg. Khup Zam Thang Champhai leh Tg. Kap Mung Hiangmunte hi uh hi.

**4) *Limpiah tawh phatna*** : Teikhang nungakte tung panin limpiah tawh Pasion min phatna la hong sak ziahziah uh ciangin

mipite bil lah tai mit lah tei teng tawh nuam kisa in tha kingah mahmah hi.

**5) Mipi Pasion phatna :** Biakpiak hun sungah mihon lasakna kinei zel a, lasak kikhahm thei mahmah loin khamlo pipi-in phatna lasak kikhawl zel hi. Phatna lasakna lamah kilawp ciat hi. Hun toi ahiah manin thangah tantan lasakna hun kinei lo hi.

**6) Male Voice :** Evan Lian Go, Evan Zel Thang, Pa Nang Mung leh Pa Lianpute in nihvei lasakna nei uh hi. Aw ngaih mahmah Pasionin a piakte uh sit lo taka Topa phatna a hong zat uh ciang bel i Pasion mah thupi kisa hi.

**6. Honthungetna :** Biakpiak kikhop simin hon thungetna om den hi. Hih theih bang ciatin Pasion maiah kipulak a thum khopna in vang nei mahmah a, khoppi nuam akisakna zong thum khopna a tam hang zong hi ding hi.

**7. Sumpi apna :** Neihsate tawh Pasion biakna thum vei kinei a, sumpite apna a nei te :- Pa Dong Ngaih Thang, Upa Phung Za Go leh Upa Cin Khen Khupte in lungsim cihtakpina tawh Pasion maiah apna nei uh hi.

**8. Nipi Sun Fellowship :** Nipi sunin biakinn ah sun fellowship hun nuam tak kizang hi. Tg. Josef

Aizawl in hun uk in, Dr. Hau Za Cinin thuhilhna hun zang hi. Dr. Cinpu in foreign gam tuamtuam a zinna khangnote theih dinga kisa a sakte a video hong laka bilvak huai in US a khapi tung aki kahna mun thupi tak hong lah bang ciangin khangnote tha hong pia in kingaihsut ding tampi hong guan hi. Dotna leh dawnna hun zong kizang a, nuam kisa mahmah hi.

**9. Biakpiak kikhop hunpi zangte leh a thugen uh a tom in :-** 1) *Rev. Cin Khan Tuang* - Leitungah lungdamna thu hilh ding nasep hong kipia pen Topa Kha Siangtho makaihna lo tawh ma kitun zolo ding hi. Galkap tampi neihna hanga gualzawh hilo in Topa Kha Siangtho huhna bek tawh ma kitun in gahpha kisuah thei hi. Pawl in Topa tawh a kituah ciangin Kha Siangtho huhna ngahin a thugenna tungtawnin mi tampi in pianthakna a ngah thute te gen hi.

2) *Rev. G.K. Ngaihte IEM Missionary* in IEM a a nasep tuamtuam report pia a, Pasion nasepna ah muanhuai kul a, talent i neihte metsak akisapna thute gen hi.

3) *Rev. Gin Lam Thang* - I lungsim mun khan in lungsim puanbuk toi lua zalin midangte

tasak ni. A khaute sausak in leitungbup a kikhung zo dingin pilna sin hahkat huai ahihna leh khetphimte kip takin khenin mun gamlapi zong muh sawmin i theihna zaisak dingin hansuahna hong pia hi.

4) *Rev. Suan Khan Thang* - Pasianin a lim zat mahmah David in mawhna a bawl khak ciangin midang ngawh ngei lo in Amah kingawh tawtung a, kei mawhna kei tungah hong tungsak in, ci in Pasian kiangah thum hi. David in Pasian mai a zon ciangin a gamin dam lawh hi. Innkuan damna dingin piakkhiatna piak kul a, mite adinga kipiakhia hih ding akisapna thute gen hi.

5) *Sia On Kam, ZBCM Missionary* -Vangteh a a nasepnate hong report a, lawki laka nasepna ah mi bangzah hiamin gupna a ngahna thu gen hi. Sep ding bawl ding tapi om a, a Kha Siangtho in hong seppih ding a, a Kha tha tawh tha saan a, khamangthangte pi khia dingin cialna zong hong bawl hi.

**9. Lungdamkohna :** Upa Cin Sian Thang in ZBMB tangin lungdamkohna nei hi. Video tawh hong cover Dr Cinpu, thugente tung, tavuan kipiakna banga hong zangte tung leh Zindo pawlpi tungah lungdamkohna hun zang hi.

**10. Hun khak thungetna :** Evan Za Biak, Upa Cin Khan Kam, Upa Pauta leh Thupha piakna Rev.Dai Do Thang leh Rev. Suan Khan Thangte in hun zang hi. Biakpiak hun sung nuam taka hong zawhpih lungdamkoh thungetna nei in, biak kikhop nuam takin kikhawl zel hi.

Hun tawp zan hun teng man khit ciangin Pasian phatna leh biakna kikhelah lai mahmah a, Zion lapi sakna tawh kipan pha kikin, lamna dianna tawh hun bang tan hiam kizang lai hi. Hici bangin kham lo takin khawmpi nuam tak kizo hi. Kikhen ni hong tunga Champhai Area leh Hnahlan Areate mawtaw 6 tawh kizui in Hnahlan lampi lamah kiciah hi.

Tutung Mission khawmpi pen khangno lam lim pai mahmah uh hi. Khawmpi pen nuam kisa mahmah hi. Hiangmun pawlpi mite kihonna thupi-in ettehtak mahmah hi. Thungaih, lasak kilawpin nuam kisa in kikham theilo hi. Thugente thuhilhna in tha hong pia mahmah a, Pasian thu-ah hatna tapi kingahlawh hi. Hun a bul pan akipanin a tawp dongin Pasian Kha Siangtho ompihna kingah ahih manin i Topa tungah lungdamna lianpi kiko hi. ■

# HIANGMUN KHOPPI SIMNA

- Dr. Hau Za Cin

*“Sia Cin, i bansah vang, Sia Cin, i bansah vang...”* hong kicih ziahziah ciangin Hiangmun khoppi nuam mahmah ding hi cih ka mu khol pah hi. Mawtawpi tawh khuamual kisuak ciaiciai, pawlpi mi hong mu masa peuhmah in tua bangin hong vaidawn ciangin gim leh tawl teng hong veng pahin, huihkhi siang diik bangin i om hong nuam pah hanhan hi. Zin hong hawm uh a, kei pen ZBC gambup ah Upa ordination ngah masa pen Upa Cin Khen Khup inn ah hong tungsak uh hi. Innsung lianpi, inn zong a golpi ahi hi. A inn bek gol, a sung bek lian hilo in, a lungsim uh zong lian hi. Ka kisilna ding tuilum hong suansak uh a, ka kisil khit ciangin tui phelkhai khat (one bucket full) khawng bek neilai uh hi cih ka thei hi. Tui hamsa, tui tawi ding omlo. *Aw! ...meigongnu sathau bing hong phawksak si e maw!* A zah tampi in Topa in thupha tawh na vukkikta hen.

A zingciangin khawmpi sim ding a tamzaw hong tung ziahziah. Teikhang khua pan hong tung masa pen, Mimbung khua in hong zompah hi. Tua zawh ciangin Vaikhawtlang pan, Sesih, Leisenzo, Champhai, Ngur, leh Aizawl in hong zom in, Hnahlan, Murlen, Vapar te zong cidam takin hong tung diamdiam uh hi. Siate leh Shillong lamte ama niin na tungkholta uh hi. A zindo pawlpi teng khoppi sung Tui dawn ding buaipih in zanhak liangin tui tawi in, gamkang phelh tawh na buai mahmah uh a, ahi zongin pangkhawm semkhawm diamdiam in vaidawn leh zinhawmte zo takin sem ziahziah uh hi. Zomi te khantohna lim leh mel atakin a kimu ahi hi.

Tunkim Nitak kikhopna ah Upa Kam Ngaih Thang phuah vaidawwna la Zola awkaih tawh hong sak uh ciangin eima inn tung bangin i om hong nuam pah lian hi.

1. *Zalna khatlo Sian vontawi teng,  
Sian in tuibang hong gawm zel a,  
Zolei tangbang i dam kim nam,  
Banzal ziat siang kilen dih ni e.*
- b. *E.M. khawmpi nunnuam zo khawm ni,  
Sian min lawibang a thanna ding,  
Laukha siangtho Jesu aw,  
Lai ah hong bual aw.*
2. *Sianmang sinthu philtang bang theh,  
Sianmang sawlsang Lia leh Taang,  
Na sung aw, Sian aw, na sung aw.*
- b. *Tongsuah zubang a khumlo zong,  
Miza sinlai a phawng dingin,  
Laukha siangtho hong leng aw,  
Sian aw hong leng aw.*

Khualzinna lamsau mahleh kuamah lusu leh ihmu om loin vaidawn kikhop a tawp dong nuamtakin kinuikhawm, kilam khawm, thungenkhawm, la kisakhawm ziahziah hi. Vaidawonna leh Maitang Lahna ah Missions Secretary Sianu Awi Ngaih Lun in Siate Rev. Suan Khan Thang, Executive Secretary; Rev. Gin Lam Thang, Shillong Area Pastor; Rev. Dai Do Thang, Aizawl Area Pastor; Rev. Cin Khan Tuang, Champhai Area Pastor; Evan. Lian Go, i/c Hnahlan Area Pastor; Evan. Zel Thang, Champhai, Evan. Za Biak, Hiangmun; Evan. Hau Za

Khup, Mimbung; Rev. Awn Kam, ZBCM Missionary, Vangteh; leh Evangelism and Missions Committee members te leh khua tuamtuum pan hong pai Upa leh pawlpi mite dingsak in vaidawonna hong nei a, khut kibeng ziahziah hi. Khoppi sim lak pan khuatual pawlpi Hiangmun tam pen hi.

Zingsang sim in Ki-apna hun Evan. Lian Go leh Evan. Zel Thang in hong makaih in mipi in nuam kisa, kimetpih in tha kingah mahmah hi. Ninoni zingsang kikhop ah Indian Evangelical Missions missionary Rev. G. K.

Ngaihte in ama nasepna hong pulak in, hanthawtna zong hong nei a, missions nasepna khangnote mawhpwak lianpi hi ci hi. Amah ZBC in i vak Pasion gam ading nasem khat ahi hi. Khoppi tawp nitak in zong missionary i vak mah Rev. Awn Kam in ama nasep pulakna leh Pasion thu tawh hanthawtna hong nei hi. I missionary vakte nih in Missions Khoppi hong zatpih theih banah amau nasepna hong pulak thei uh ahih manin Mission Khoppi a gahpha, a manpha leh a lawhcing hi ciin ka ciamteh hi. Pasion gam zai nading nasep tawpsan loin hatzaw sem in panlani.

Ninoni sun hun pen Khuasung Hawlna ding hun-awng (sight seeing) in kikoih a, pawlkhat in Zomi tenna khuapi khat ahi Mimbung khua vahawh a, pawlkhat Hiangmun khuasung hawl in, pawlkhat in meltheih u leh nau vehin, pawlkhat in Pasion thu tawh holimna hun tuamtuan zang uh hi. Khuatual nungak tangvalte nitak lam ciangin khuataw ah gam kang ahih manin meiphelh dingin kuankhia uh a, zan nai 12 ciangin zong meiphelh

dingin tai kik uh hi. Gam keu ahih manin gamkang tam a, gam kang leh khua lumsak semsem ahih manin, gam kangsak lo dingin mipi hanciam kisam mahmah hi. Tui dawn ding a buaipih uh tawh, meikang a phelh uh tawh khuatualte gim mahmah ding uh hinapi maitai takin Biakinn lam zuan diamdiamin, hun nuamtak kizang khawm hi.

Khoppi hun ah thupi kasak penpen ahihleh Hiangmun khuapi inn 120 val sunga Biakinn om khempeuh, hih ZBC Mission Khoppi sungin kikhak a, Khoppi hong uapkhin uh hi. Late 33 sungah ‘sanggam banga a tukhawm dimdiam mite Topa muhna ah a etlawm’ ahih dan kigente hong phawksak hi. Ka zin ka vakna ah hih banga etteh huai, a kilawm gamtatna leh Pasion mina kalsuan khawmna ka mu naikei a, Hiangmun khua leh a khuamite ka zahtakna leh thupi kasakna a lian semsem hi. Zomi vive tenna khua ahih manin “‘A khangto toto Zomi te’ hi khong ve hang e,” ka ci hi. Khuadangte in zong hih bang kithutuakna etteh dingin hoih kasa hi.

“Tu tung Khoppi ah Sia Thang (Rev. Gin Lam Thang) thugen thangah pen ing” ci a mite kihona kaza sim a, ka zaksim bek hilo in kei tungah zong hong gen om tanghial hi. ‘Banghang ahi tam maw’ ciin ka ngaihsun ngiungiau hi. Banghanga mite in thangah diak uh ahi tam maw ka ci a, kuama kiangah lah ka dong ngam kei hi. Shillong ka tunkik ciangin, “Tu tung Sia Thang thugen a pai hiam?” ciin hong kidong vat maw a, “Bang hang in maw...?” “Ko thu nakpi in na ngetsak hi ve ung, tun zong Sia Thang thugen pen mailam ah tha kingah semsem ding hi,” ciin hong behlap zawlai hi. ‘Hi maw, Pawlpi mite in i siate adingin thu nakpi in i ngetsak kisam hitah maw’ ciin ka ngaihsun hi. Guwahati ah a omlai in Sia Rev. Dr. JM Ngul Khan Pau in, “Thu ka gen ciang thu hong kingetsak leh hong kingetsakloh theihna khat nei ing, kibanglo hi,” cih gen ngei hi. Sia Thang adingin a khawk mipi in thu limtak a ngetsak lamtak uh aman theihna khat neikha ngel ding hi.

A thei kei zongin mite thungetsakna hangin a thugen in

vang nei hi cih kidawk hi. Thupi kasa hi. Pawlpi mite aw, i siate thungetsak ding eima tavuan hi. I mawhpuak, i tavuan i sep kei leh a sum ding eimah hi hang cih hong phawksak kasa hi. A gen a siamtuam hi kenteh, ahi zongin thungetna vang ama thugenna ah kilang hi!

Nipini zingsang zong Ninoni nitak mah bangin Kha Siangtho in hong ompih a, Pasian phata lamna, dianna leh lungdamna khutte lamto a Topa phatna hun nuamtak kizomto ngitngat hi. Kikhop khat ah phatna lasa ding mi 10 pan 16 bang pha den a, a kisam khin manlo zong om kha phial ding hi. Pasian a lunggulh mite Topa in thupha pia hamtang ding cih ka um hi. ‘Gammial nasepna ah thapia ni’ cih thulu tawh ZBC Executive Secretary Rev. Suan Khan Thang in pawlpi mite hong hanthawn a, “Gammial nasepna ding mimal pan kipan ding hi. Piak khatna tawh kizom a, neih leh lam sum leh pai bek hilo tanu, tapa leh hun leh nuntakna nangawn Topa adingin piakkhiat ngam kisam hi,” ci hi. A citak nungzui suahna ding leh

a muanhuai Topa nasem suahna ding zong limtak gen a, Pasion thu a manphatna leh hong nusia ngeilo Immanuel ahihna zong gen hi. Tha kingah a, hun tomno cik sung tawh kibang hi.

Nipini Sun hun ah Khangnote Hanthawtna Hun ciin Dr. Hau Za Cin in ama zinna leitung gam tuamtuam maan te Computer pan in lakin, hanthawtna tawh zomsuak a, tha kingah mahmah hi. Leitung kimvial a Topa in khatvei khual a zinsak thu leh a khangto gam peuhmah Pasion phawka kalsuan gam leh minam ahihna thute gen a, Zomite zong Pasion phawka kal i suan manin ‘a khangtoto minam’ i hi hi ci hi. USA ah Zomi tul thum val omte, Australia ah Zomi om, Japan, Singapore, England, Germany, Norway, New Zealand, etc leh, leitung gam khangto khempeuh ah Zomi om a, tua pen eima thahatna hi loin Topa hong lapsangna, Topa hong domtohna Thupha hi, ci hi. Tua manin Topa phawk in mainawt zel ni. Pilna siamna zonna, nek le dawn zonna, sep le bawlnate ah zong Topa tawh kalsuan den dingin

vaikhak hi.

Mangpha khak ni zan hong tung a, lungsim ka neunau hi. Khoppi lah nuam kisa panpan, a hun lah bei ding hita, lawm leh gual kimeltheih saan, kikhohh hun ding lah tom semsem! Aw, leitung aw, laphuakpa in, “Tu nuam taleng ding, khawl nuam taleng pai, Hih leitung kikhenna gam hi,” acih mah bangin, “Omkhawm lai leng nuam lai, hun te’n hong kheng ta.” Ahi zongin, “Phat ni, heina peuh ah Topa Phat ni.” Hiangmun pawlpi in Mangpha khakna la hong sa uh a, zing khuavak cianga ciah ding khempeuh lungsim ah lungzuanna thelbang tho hi. Mipi lasak nop semsem a, lamna, dianna te zong ki-am semsem hi. Hun uk, thugen, lasa leh lungdamkohna hunte in hong kheng a, ut mah taleng kikho theilo, ngai mah taleng kisamkik theilo... Hiangmun khoppi a tawpna kitung ta.

Mangpha kikhak in khut kilen, mittang ah ki-encim theilo, lungzuang takin kikha, ‘Khoppi kik ciang kimu ni aw’ ci a thupha kipia-in, eima lupna lam ciat

kizuan ta hi. Tua zan tung Solkhapi lah taang pha sem a, ihmud pah ding ollo hi. Holim kawmkawm in ‘kholhkhop hunnuam’ ki-am a, hocim manlo Ak masa hong khuanga, lupna kidenna in mengme pan cih ciang Ak thumveina hong khuang leuleu, mit nuai kawmkawm in lupna pan kitho, Aizawl lam zuan dingte Bus pai hun hong tung...  
*lakik thei leng maw...*

Van teng kiguang khin, Bus sungah Upa Cin Lian in cidam taka ka khua leh tui ciat uh tung dinga Topa tungah vai khempeuh hong apsak khit ciang ka paita uh hi. Lia Piangi leh Lia Thang Man te in Hiangmun khuawhl Humpi Mual gei tan hong kha uh a, ‘cidam in mangpha aw’ a cih khit uh ciangin Bus in hong taipih

suak a, Hiangmun pel, Teikhang tungphei, cidam in Aizawl nitak nai 7:00 in tung. A zingciang Sia Gin Lam Thang tawh Shillong ka paisuak uh a, cidam in March 17, 2010 zingsang nai 9:00 in ka tung uh hi. Ka zinnu uh Nu Niang Khaw Cing w/o Upa Cin Khen Khup in hong puaksak Bethekue ka huan uh a, a ne khempeuh in “Hih Beteh limsi e, a ngek vive kiphek hi maw,” ciin gilvah tak in ne ciat uh hi.

Topa in khoppi pai khempeuh amau khua ciat cidamin tungkik sak a, ni khat ni ciang kimu kik dingin hong kem hong huaiden lai ding hi. Vangliatna, Minthanna leh Thupina khempeuh Topa bekin tang tawntungta hen. Amen.  
*Khoppi sim zin 270 pha hi.//*

---

---

## SIANGTHO KITENNA

Leisenzo ZBC member ahi, Lia Ngul Sian Dim D/o Upa Pum Do Lian leh Tg. Ngin Sawm Pau te Dt. 9.4.2010 niin Leisenzo Presbyterian biakinn ah Siangtho kitenna nei uh hi. Laitai Editorial Board in kilungdampih mahmah a, vondeih zatam a tawi dingin Sian in siam ta hen.

- *Laitai Editorial Board*

# ZOLAI GELHZIA

- Rev. Khoi Lam Thang  
General Secretary  
Bible Society of Myanmar

## ‘A’ Zatzia

‘A’ kizatna a tam mahmah kampau khat ahi hi. “*Pasian in leitung mite hong it mahmah ahih manin ama Tapa a um mi khempeuh si nawm loin a hin tawntung theih nadingun a Tapa neihsun a hong piak dongin a hong itna a hong lak hi. (Johan 3:16.)*

A kizatna a tawm pen nam thum om hi.

Tuate in ;

1. Mintang (pronoun) dinmun kizang **a**

Hih dan a kizang **a** peuhmah tang din den ding hi.

**a** lawmnu, **a** ballpen, **a** lungsim (**amah**, **ama**, **amah**’n, **cihte** pen mintang (pronoun) vive mah ahih manin kikhen thei lo hi.)

2. Kamzopna (conjunction) **a**

dinga, hong pai-**a**, khituite **aluang** dinga,

kamzopna khempeuh tuamdin lo dinga, awpheikop tawh a kinei leh thekna tawh kidei ding hi. Kamzopna hi a, kamvui tumtawng ahih manin, **a** khit ciang /, / in zui den zaw hi.

3. Mangte in copula verb **a** cih kammal

ahi hi, ahih hangin, asia apha, asuk ato,

Hih kammal pen pawlkhatte in *mintang*(pronoun) **hi-a**, *tangdin ding hi* ci uh hi. **A** hi, **na** hi, **ka** hi : dinmun-in laleng ahi ding bang napi, ngaihsun phaphaleng hi khin lo hi. Mangte’ **is**, Mizote’ **ani**, Falam/Hakhate’ **asi** tawh kibang hi. Tua banah, **asia**, **apha**, **asuk ato** cih kammalte ah a pen pronoun hi het lo hi. Tua ahih manin hih bang munte ah **a** tangdin keileh hoihzaw hi. ■

## LUNGDAM KOHNA

Pa N. G. Vala, Aizawl in Laitai huhna Rs. 90/- hong pia a, Laitai Editorial Board in lungdam thu, Laitai tungtawnin hong pulak hi. Topa'n thupha hong piaksak zel ta hen.

Prof. Zam Liang Mang, Govt. Saitual College Lecturer in Laitai huhna Rs. 190/- hong pia ahih manin Laitai Editorial in Laitai tungtawnin lungdamna thu kipulak hi.

## LAI SIANGTHO SANG THAK KIHONG TA

- Sang min : Kalay Theological College (KTC)  
Programme : Bachelor of Theology (BTh)  
Motto : Learn from Me" (Matt. 11:29)  
Purpose : To produce Christ-centered Ministers  
To promote Christ-centered Ministries  
21 May 2010 : Application Form puak/ap ni a nunungpen  
28 May 2010 : Exam Card lak/thoh ni  
1 June 2010 : Entrance Exam & Oral Test  
3 June 2010 : Entrance Result

Kizopna : Registrar

Kalay Theological College

Head Quarters of KVBA, NKVBA, and SKVBA

Aungzabu Street, Pinlone 8, Kalaymyo 02091

Sagaing Division, Myanmar

Phone : 095-73-21517

E-mail : [kalaytcollege@gmail.com](mailto:kalaytcollege@gmail.com)"

Sd/-

Hau Khen Kham

Registrar

Kalay Theological College

## TULAI THUPIANGTE

1. ZBC Mission Supporter ahi Nu Diana Khawkhoh in a sepna SIB lam tawh kisai training dingin Himachal Pradesh ah kuankhia hi. Amah Pa Pau Lian Thang Vaiphei (SIB) zi hi a, ZBC tungtawnin Missioanary support uh hi.
2. Zokhawthar a ZBC Pawlpi Member Daw Mante innkuan in Taxi khat lei thak uh a, a lawmpa in hawlpha hi.
3. April 9, 2010 in Aizawl ah ZBC Executive Secretary, Rev. Suan Khan Thang leh ZBC President, Upa Gin Za Gote in Bible Society of India makai Thangnghilhlova leh BCM General Secretary, Rev. Liangngaia-te mailam nasep nading tawh kisaiin kimuhpih uh hi.
4. April 6 - 8, 2010 in Norway Baptist, Asian Pacific Baptist, BCM, ZBC leh Lairam Baptist makaite in mailamah nasepkhop a kuldan kikupna nei uh hi. ZBC tangin Executive Secretary, Rev. Suan Khan Thang kihel hi.
5. **Tedim Lai Siangtho bupi (Puahphatna), Thuciam Thak buneu** leh Rev. Khup Za Go gelh “**Leivui Panin**” cih laibute ZBC zum panin kingah thei lai hi.
6. Pu Ngul Khan Zam, Intelligent Officer, Champhai in Sesih English Medium School building Sikkang lei nading ama seppihte (SIB Dept) tung pan Rs. 13,500/- hong donkhiatsak hi. Amah leh a lawmte in Pasian gam leh i minam a itna uh thupi mahmah hi.
7. Manipur Chief Minister in April 13, 2010 in All India Radio Churachandpur Sub-Station hawwna nei hi. Hih station ah pau zat ding (Link Language) Paite pau ahilh thu zong gen hi.
8. April 5, 2010 niin Rev. G. K. Nang in Fuller Theological Seminary, Pasadena, California State, USA pan a Ph.D. Thesis defense zo ta hi. Zomi tangthu sungah Ph.D. degree ngah khat a kibehlap kik hi. Pasian in pha hong sakpih leh June 2010 ciangin lukhunelkai khu dinga, a khutsungah a Doctorate degree kipia ta ding hi. Tua hun ciang Zomi bangzah hiam in uap theih sawm cih thu kiza hi.

9. Tg. K. Joseph, Aizawl in ZBC library adingin N.G.O. tawh kisai laibu khat ZBC hong pia hi.
10. Thuampui ZBC Pawlpi ah mi kibehlap zel cih thu kiza.
11. April 19, 2010 in Tedim Baptist Convention makaite 62 in Champhai ZBC Phualpi hong pha uh a, Champhai a ZBC makaite leh Siate tawh sun khat leh nitak khat kithuahkhopna(fellowship) neikhawm uh hi.
12. Lia Rody Za Lian Siing d/o Rev. Dr. Enn Za Sian, E. S., CBA, Lamka tanu in Bangalore ah a sang kahna panin tan 10 laivuanna ah subject tengah distinction (All D) ngah a, kilungdam pih mahmah hi.
13. ZBC sung pan 2010 HSLC passed thakte (a kithei ciang) :

***Min***

***Pa min***

***Div.***

**Aizawl**

- |                        |                          |                               |
|------------------------|--------------------------|-------------------------------|
| 1. Lia Rosy Ngaih Muan | <i>Upa Dal Go</i>        | Dist. (L-E, SS, Sc)           |
| 2. Lia Cing Sial Don   | <i>Pa S.B Khup Pau</i>   | Dist. (L-SS, Sc)              |
| 3. Tg. K. Benjamin     | <i>Upa H Thawng Pau</i>  | I <sup>st</sup> . Div. (L-SS) |
| 4. Lia Dim Ngaih Kim   | <i>Rev. Dai Do Thang</i> | I <sup>st</sup> Div. (L-Mz)   |
| 5. Tg. G. Za Muan      | <i>Sia Vum Hau Thang</i> | I <sup>st</sup> Div.          |

**Champhai**

- |                       |                                 |                        |
|-----------------------|---------------------------------|------------------------|
| 1. Michael K.C. Thang | <i>Pu Ngul Khan Zam</i>         | I <sup>st</sup> Div.   |
| 2. Samuel H. K. Muan  | <i>C/o Pa T. Cin Ngaih Lian</i> | I <sup>st</sup> Div.   |
| 3. Lia Khup Ngaih Nem | <i>Upa Tual Suan Mang</i>       | III <sup>rd</sup> Div. |

**Sesih**

- |                        |                         |                        |
|------------------------|-------------------------|------------------------|
| 1. Tg. Khup Za Lian    | <i>Khual Kap</i>        | II <sup>nd</sup> Div.  |
| 2. Tg. Lian Sawm Dawng | <i>Upa Dal Go Thang</i> | III <sup>rd</sup> Div. |

**Murlen**

- |                            |                            |                       |
|----------------------------|----------------------------|-----------------------|
| 1. Tg. Thang Lun Lal       | <i>Upa Gin Deih Piang</i>  | I <sup>st</sup> Div.  |
| 2. Lia Cing Lawh Sawm Cing | <i>Upa Nang Ngaih Lian</i> | II <sup>nd</sup> Div. |

**Hnahlan**

- |                        |                         |                       |
|------------------------|-------------------------|-----------------------|
| 1. Tg. Thang Muan Lian | <i>Pa Pau Neih Lian</i> | II <sup>nd</sup> Div. |
|------------------------|-------------------------|-----------------------|

FORM IV  
(See Rule 8)

*Statements about ownership and other particulars about  
Laitai*

1. Place of Publication : Champhai - 796 321, Mizoram.
2. Periodicity of its publication : Monthly
3. Printer's name : Rev. Suan Khan Thang  
Nationality : Indian  
Address : ZBC Office, Champhai 796 321
4. Publisher's name : Rev. Suan Khan Thang  
Nationality : Indian  
Address : ZBC Office, Champhai 796 321
5. Editor's name : Rev. Suan Khan Thang  
Nationality : Indian  
Address : ZBC Office, Champhai 796 321
6. Name and address of individuals who own the newspaper and partners or share holders holding more than one percent of the capital : Zomi Baptist Church

I, Rev. Suan Khan Thang, hereby declared that the particulars given above are true to the best of my knowledge and belief.

Dated Champhai  
January 25, 2010

Sd/-  
Rev. Suan Khan Thang  
Signature of Publisher.